

Mesir mungkin, daripada apa yang kita lihat, akan dikeluarkan lagi daripada Yaman sehingga umat Yaman yang yang menentang hpus, hpus daripada dunia ini.

Perwakilan kerajaan Sa‘udiyyah ‘Arabiyyah di dalam Majlis Bangsa-bangsa Bersatu telah menyampaikan bahawa lebih daripada 100,000 umat Yaman, di kampung-kampung yang telah terbunuh oleh askar-askar Mesir dalam pengebomannya tetapi malangnya dunia tidak mengendahkan soal-soal ini, malangnya dunia tidak melihat soal-soal ini bagaimana pembunuhan yang dilakukan terhadap kepada umat Islam yang dilakukan oleh suatu umat yang mengatakan dirinya sendiri beragama Islam.

Adakah ini kerana di dalam dunia-dunia luar yang bersifat Kristian lebih mengutamakan Kristian dan senghaja hendak melumpuhkan kedudukan Islam? Ini menjadi suatu pertanyaan, apa lagi kalau hal ini kita bandingkan dengan keadaan di Vietnam - kerana di Vietnam masih banyak *missionary-missionary* Kristian yang berpengaruh yang berada di sana bersama-sama berganding bahu dengan orang-orang Buddha yang menjadi penduduk yang banyak di situ.

Beginilah nasibnya negara-negara Islam pada mata dunia *international*. Beginilah kedudukannya kalau peristiwa-peristiwa terjadi di negara-negara Islam tidak ada campuran dunia *international* yang wajar yang untuk menyelamatkan manusia-manusia Islam itu daripada pembunuhan-pembunuhan yang tidak wajar dilakukan terhadap kepada mereka. Inilah contohnya dan inilah yang patut diperhatikan oleh seluruh umat Islam yang sedar yang menghendaki supaya persaudaraan

Islam dibina dengan sebaik-baiknya.

* * *

Lagi Mengapa?

Di dalam Kongres Bahasa yang pertama yang diadakan di Singapura yang menelurkan “Dewan Bahasa dan Pustaka” telah diambil suatu keputusan supaya tulisan Rumi dan Jawi dialirkkan bersama-sama di dalam usaha-usaha mengembangkan Bahasa Melayu. Kementerian Pelajaran Persekutuan berjanji akan melaksanakan semua keputusan-keputusan itu.

Melihat kepada perkembangan ini, di dalam perkembangan Bahasa Melayu yang berjalan sekarang, terutamanya yang dijalankan oleh usaha-usaha kerajaan seperti penerbitan Dewan Bahasa dan Pustaka maka hampir-hampir tulisan-tulisan Jawi tidak lagi dikembangkan dan tidak lagi menjadi siaran yang utama, atau pun diusahakan dikembangkan dengan sebaik-baiknya kerana selain daripada buku-buku bacaan Jawi (bacaan sekolah rendah) dan buku pelajaran agama, sepanjang yang kita ketahui, tidak ada disiarkan siaran-siaran dengan huruf Jawi. Kalau ada pun siaran kerajaan seperti siaran-siaran Jabatan Maklumat hanya majalah-majalahnya sahaja. Ini tidak bermakna bahawa usaha mengembangkan tulisan Jawi itu ada dijalankan dan diusahakan dengan luasnya.

Dengan keadaan yang serupa ini, kita melihat bahawa kesulitan-kesulitan yang dihadapi pada masa sekarang ialah anak-anak muda yang baharu timbul, terutamanya di bandar-bandar dan yang bersekolah di sekolah Inggeris, tidak dapat lagi membaca huruf Jawi sekalipun ada

rangka atau dasar kerajaan Malaysia menyuruh mempelajari huruf Jawi.

Suruhan berjalan tetapi galakan tidak ada – bermakna dengan tidak disedari bahawa lama kelamaan huruf Jawi akan terbunuh dan dengan sendirinya juga pengaruh agama akan terbenam sama kerana umumnya buku-buku yang berbau agama pada masa-masa yang telah lalu di Tanah Air kita ini ditulis dengan huruf Jawi. Dan untuk mempelajari agama dengan mendalam, huruf-huruf Jawi itulah yang lebih dalam perkembangannya.

Melihat kepada perkembangan ini juga maka apabila di Malaysia Barat bahasa Melayu telah menjadi bahasa rasmi sebagai bahasa kebangsaan pada bulan September 1967 ini maka kita berharap patutlah sekarang dimulakan suatu langkah oleh Dewan Bahasa dan Pustaka untuk menyusun hal-hal yang mengenai dengan pelajaran jawi, menetapkan dan menyusun hejaan-hejaan Jawi dan seterusnya kerana pada masa ini hejaan-hejaan itu pun di antara satu dengan lain tidak sama.

Harapan kita, selagi di dalam perlombagaan agama Islam agama rasmi Malaysia maka dengan sendirinya huruf Jawi, huruf yang dahulunya berdaulat di Tanah Air kita ini mestilah dihidupkan semula dan didaulatkan.

* * *

Keadaan di Timur Tengah

Peristiwa pertentangan di antara Syria dan Israel di dalam mana telah berlaku perjuangan-perjuangan kecil di antara kedua-dua pihak, dengan

sendirinya telah melibatkan kerajaan Republik Arab Bersatu yang telah berikat dengan kerajaan Syria untuk saling bantu-membantu di antara satu dengan lain.

Apabila terjadi peristiwa pertentangan di antara Mesir dengan Israel pada tahun 1956 maka Bangsa-bangsa Bersatu, dengan tidak ada bantahan dari kerajaan Republik Arab Bersatu, telah meletakkan suatu pasukan tentera di sempadan di antara Gaza yaitu sempadan di antara Republik Arab Bersatu dan Israel yang panjangnya 117 batu yang sampai ke Bukit Sinai. Adanya tentera Bangsa-bangsa Bersatu di sempadan itu menjadikan tidak ada konflik bersenjata di antara Mesir dengan Israel berlaku semenjak sepuluh tahun yang lalu tetapi ada kemungkinan dalam masa itu kerajaan Israel telah bersiap-siap di sana untuk bertahan daripada kemungkinan serangan-serangan tentera Mesir ataupun bersiap untuk melengkapkan persenjataan untuk menyerang Republik Arab Bersatu. Kemungkinan ini mesti ada dan di dalam persiapan sepuluh tahun itu tentulah segala-galanya dilengkapi dengan semoden-modennya terutamanya kerajaan Israel didirikan dengan bantuan *imperialist-imperialist* yang bertujuan atau yang telah menegakkan kerajaan Israel di situ dengan sengaja untuk menghalang kebangkitan-kebangkitan yang hebat di Timur Tengah.

Di dalam persoalan menghadapi Palestin atau terangnya menghadapi Israel, seluruh negara-negara Arab sekata dan mungkin dengannya dapat bersatu jika masing-masing menjalankan tujuannya dengan ikhlas – tidak ada

satu niatnya selain daripada untuk berjihad bersama-sama meletakkan tanah suci itu kepada hak mutlak umat Islam dan di dalam kawalan bangsa Arab. Tetapi yang demikian ini, di dalam perkembangan yang ada sekarang mungkin menjadi suatu pertanyaan yaitu sangat sulit menyatukan mereka kerana pertentangan-pertentangan hebat di antara golongan-golongan Arab yang beraja dan sifat-sifat menyerang golongan-golongan yang menamakan dirinya revolusi rakyat yang dipimpin dan dianjurkan nampaknya oleh kerajaan Republik Arab Bersatu.

Seluruh umat Islam umumnya dan umat Arab amnya pada mulanya mempercayai pimpinan dan anjuran kerajaan Republik Arab Bersatu dalam persoalan bersama-sama menentang Israel tetapi kepercayaan dan keyakinan kepada keikhlasan perjuangannya terhadap ini sudah luntur apabila kerajaan Republik Arab Bersatu menghantarkan tenteranya bagi menegakkan Republik Yaman. Peristiwa inilah, dan beberapa peristiwa-peristiwa yang terjadi pernah ditulis dalam majalah ini, nampaknya menjadikan turunnya taraf pandangan umum kepada kerajaan Republik Arab Bersatu sehingga diberitakan pada saat yang akhir ini pun ada golongan-golongan Arab memandang bahawa langkah yang diambil oleh Republik Arab Bersatu bagi mengatur pasukannya menentang Israel itu sudah terlewat. Menurut mereka sepatutnya langkah itu dilakukan apabila sahaja Jordan diserang dan demikian juga Syria diserang dan pada saat itulah masa sebaik-baiknya umat Arab bergerak bersama-sama untuk “menghalau” orang-orang Israel yang telah bernegara

di tanah yang dippunyai oleh orang-orang Arab.

Tetapi ada suatu perkara yang nampaknya tidak memungkinkan kerajaan Republik Arab Bersatu mahu bekerjasama dengan sebahagian daripada kerajaan-kerajaan Arab kerana dengan sifat *sosialist*nya ia menghendaki supaya seluruh negara Arab yang beraja seperti Jordan, Sa'udi 'Arabiyyah, kerajaan-kerajaan di Teluk Parsi dan deret-deretnya dihapuskan dan diganti dengan kerajaan daripada rakyat – republik. Langkah-langkah ini ialah langkah yang nampaknya diutamakan lebih dahulu oleh Republik Arab Bersatu gunanya supaya apabila musuh-musuh yang di dalam, apabila ia dapat meruntuhkan kuasa-kuasa ini, yang dapat dipandang sebagai tujuan menghapuskan pengaruh-pengaruh yang dikatakan pengaruh-pengaruh *imperialist* Barat di tempat-tempat itu baharulah ia akan bergerak menghadapi orang-orang dari luar dengan dasar-dasar Sosialisnya. Dengan demikian maka pertentangan di dalam, menghapuskan sebuah demi sebuah kerajaan beraja dengan berbagai-bagai cara terutamanya dengan cara propaganda kemudian disusul dengan bantuan mengadakan sabotaj dan lain-lain di tiap-tiap negara untuk menentang raja-rajanya, maka dengan demikian ia akan menyampaikan cita-cita itu dan sebab itulah mungkin orang akan menampak bahawa tidak ada kemungkinan di dalam keadaan yang sekarang akan ada persatuan umat Arab bagi bekerja dan bergerak menentang sebuah negara yang kecil – Israel – yang menjadi duri di negara-negara Arab itu.

Yang demikian ini dapat kita lihat sendiri bagaimana *President*